

Miroslav Lajčák u Rimu sa italijanskim ministrom vanjskih poslova Francom Frattinijem



<?xml:namespace prefix = o ns = "urn:schemas-microsoft-com:office:office" />

Visoki predstavnik i specijalni predstavnik EU, Miroslav Lajčák danas se u Rimu sastao sa italijanskim ministrom vanjskih poslova, Francom Frattinijem kako bi ga informirao o trenutačnoj političkoj situaciji u Bosni i Hercegovini i o napretku koji je zemlja ostvarila u ispunjavanju pet ciljeva i uslova postavljenih od strane Upravnog odbora Vijeća za implementaciju mira, kako bi moglo doći do tranzicije ureda OHR-a u Ured specijalnog predstavnika Evropske unije.

“Značajni pomaci jesu napravljeni u realizaciji pet ciljeva”, rekao je visoki predstavnik i specijalni predstavnik EU, “ali još uvijek nisu riješena dva veoma važna pitanja: nije pronađeno provodivo rješenje za pitanje državne imovine i nije osigurana puna integracija Brčko distrikta u ustavnu strukturu BiH, što zahtijeva ulaganje dodatnih napora svih strana koje čine vladajuću koaliciju.”

Visoki predstavnik i specijalni predstavnik EU, Miroslav Lajčák naglasio je da će političari u BiH morati pokazati mnogo pozitivniji pristup kada je u pitanju ispunjavanje drugog uvjeta upravnog odbora PIC-a, dobijanja pozitivne

ocjene od strane upravnog odbora Vijeća za implementaciju mira, zasnovane na punom poštivanju Daytonskog mirovnog sporazuma.

“Građani BiH očekuju takav stav od svojih političara, očekuju od njih da se bave pitanjima koja će dovesti do poboljšanja životnog standarda, suzbijanja nezaposlenosti, korupcije i kriminala, kako bi zemlja brzo krenula ka Evropskoj uniji”, rekao je Visoki predstavnik i specijalni predstavnik EU Miroslav Lajčák.

Tokom sastanka u Rimu, visoki predstavnik i specijalni predstavnik EU, Miroslav Lajčák informirao je italijanskog ministra vanjskih poslova Frattinija i o napretku koji je BiH postigla u ispunjavanju obaveza iz Sporazuma o stabilizaciji i pridruživanju, odnosno ispunjavanju uslova sa liste kratkoročnih prioriteta na osnovu kojih će Evropska komisija ocijeniti sveukupan napredak BiH ka članstvu u Europskoj uniji.

Ministar Frattini je ponovio da je Italija, kao i sve ostale države članice Evropske unije opredijeljena da pomogne Bosni i Hercegovini u ostvarivanju cilja pristupanja Evropskoj uniji.